

Guekgingq Mbanjyauz Minzsuz Funghcingz Yinx Hekyouz Lai

国庆长假瑶寨民俗风情引来八方游客

10 nyied 1 hauh banhaemh, Ginhsiu Yauzcuz Swciyen Ginhsiu Cin Mbanjliuzcunh nauhyied dangqmaz, ngaizdaizraez、minzsuz biujyienj daengj hawj hekyouz daj gak dieg daeuj haenx daejniemh baez Mbanjyauz funghcingz mbouj doxdoengz he, cawz foux lej coux hek、foux daemhaeux daengj yenzswnghdai diuqfoux, gyoengq hekyouz lij ndaej yawj bin laebakcax、lohndin caij danqndongq、caij bakcae ndongq daengj dinfwngz ak Yauzcuz biujyienj, gamjsouh duenz bawxmoq、aemq bawxmoq、diuq fouxsaux daengj Yauzcuz funghcingz naekna he.

Ciuq cam rox, aen yienh neix baengh seizndei aen hozdung laebbaenz Gvangjsih aen yienh daegsaek lijyouz mizmingz neix, cugbough guhbaenz Mbanjgucan、Mbanjroekduenh、Mbanjmung daengj Yauzcai swnghdai minzsuz vwnzva lijyouz funghcingz. (Cinz Haijyen/秦海燕)



▲ Hekyouz caeuq beixnuengx Yauzcuz itheij gwn ngaizdaizraez.



▲ Dah neix caen mbouj lau ndat bw.



▲ Laeuj ndei gingq bouxhek.

Baeuqroxdox Ngaizgairaez Hoenghhwd Nauhyied

热闹喜庆的布洛陀长街宴

10 nyied 1 hauh, gaiq daih' it baeuqroxdox ngaizgairaez aeu "angqhoh funksou • angqhoh guekgingq" guh cawjdaez haenx youq Denzyangz Yen Denzcouh Gujcwngz gawjbanh, hainduq hoengh guh aen hozdung bineix ciet funksou conzdungj Bouxcuengh.

Mbanjcuengh miz gij funksug conzdungj gvaq ciet funksou, binaengz sou haeux haenj cang le, aen cin neix vunzlai Bouxcuengh gak bengih faenbied dingh gvaq ciet funksou seizgan, gaj gaeq gaj bit guh ceiz, iucingj caencik baengzyoux doengzcaeaz angqhoh funksou, roxnaeuz daengx mbanj saimbwk lauxnyez itheij comz youq gyang mbanj dieg gvangqlangh angqhoh bimoq engqgya funksou. Youq seiz ciet funksou, gak bengih yungzhaeuj gak cungj gak yiengh hozdung, demgya heiqaen ngoenzciet caeuq yienh'ok daegsaek ngoenzciet, miz fouxlunz fouxsaeciej、doiqfwen、yienjheiq daengj yienh'ok ndawbiengz condungj vwnzva.

Bineix gaiq daih' it baeuqroxdox ngaizgairaez gungh baij daizlaeuj bak daiz, moix daiz cujyau miz Mbanjcuengh haeuxnaengj haj saek、bitgangq、nohgouyuz daengj byaek daegsaek dangdieg, cien lai boux betfueng hekyouz camgya hoihlaeuj, daihgya doq gwn gijgwn ndei、laeuj ndei Mbanjcuengh, doq yawjngonz minzsuz Bouxcuengh biujyienj, doengzcaeaz angqhoh Mbanjcuengh daengx bi funksou, hohfuk guekcoj ngoenz maenh'ak gvaq ngoenz. (Vangz Gozsun/黄国顺)

Lozcwngz:

Lwgnyez Guh Guekgeiz Angqhoh Guekgingq

罗城：小朋友制作国旗喜迎国庆

9 nyied 30 hauh, Lozcwngz Mulaujcu Swciyen Siujhungzmau Youwzyenz faenhyen gyoengq lwgnyez youz cawjranz caeuq lauxsae sonyinx raed nem guh guekgeiz, angqhoh Cunghvaz Yinzminz Gunghozgoz laebbaenz 66 hopbi. Dangngoenz, aen youwzyenz faenhyen neix gawjbanh "fwngzhung yien fwngziq" angqhoh guekgingq hozdung,cawjranz caeuq lauxsae itheij sonyinx gyoengq lwgnyez raed nem guh guekgeiz, vanzlij sonyinx gyoengq lwgnyez youq gwnz baengzhauraez "fwngzhung yien fwngziq angqhoh guekgingq hozdung" ciemmingz, caenh' itbouh son' gyauq gyoengq lwgnyez daj iq rox ndiepgyaez guekcoj. (Se Sunhwngz/谢顺珩)



▲ Cawjranz caeuq lauxsae son lwgnyez guh guekgeiz.

Sanhgyangh: Vaiz Doxdaemj Hoh Guekgingq

三江：牛王争霸庆国庆



▲ Song duz neix daemj ndaej caen ndei yawj.

10 nyied 1 hauh, Sanhgyangh Duncuz Swciyen gawjbanh daihsam gaiq gozci ciet vaiz doxdaemj, 140 lai duz vaiz daj Yeznanz、Daigoz、Menjden caeuq Yinz-nanz、Gvangjsih、Gveicouh daengj dieg daeuj haenx, youq guekgingq geij ngoenz de youq aen yienh neix Dung' yangh ciengzdoxdax rongzroeg guh doxdax, vih betfueng hekyouz yienj ca mbouj geijlai bak ciengz vaiz doxdaemj ndei yawj, yienhok Dung' yangh daegsaek minzsuz funghcingz, haenqrenz dajcauh Duncuz vwnzva mingzben "heiqvaiz cib cuk" he. (Gungh Bujgangh/龚普康)